

Neum, 06.05.2010. godine
Broj: 168/10

ZAPISNIK I ZAKLJUČCI
SA DEVETE SJEDNICE PREDSJEDNIŠTVA SKUPŠTINE
SAVEZA OPĆINA I GRADOVA FEDERACIJE BOSNE I HERCEGOVINE

U Neumu je dana 06.05.2010. godine održana Deveta sjednica Predsjedništva Skupštine Saveza općina i gradova Federacije Bosne i Hercegovine (u daljem tekstu: Predsjedništvo Skupštine Saveza).

Sjednici Predsjedništva Skupštine Saveza prisustvovali su:

1. **g-din Husejin Smajlović**, načelnik Općine Zenica, predsjednik
2. **g-din Hasan Ajkunić**, načelnik Općine Bugojno
3. **g-din Ermin Hajder**, načelnik Općine Bosanski Petrovac
4. **g-din Amer Čenanović**, načelnik Općine Ilidža
5. **g-din Salem Dedić**, načelnik Općine Jablanica
6. **g-din Rasim Omerović**, načelnik Općine Kalesija
7. **g-din Luka Jurić**, načelnik Općine Odžak
8. **g-din Miroslav Živanović**, zamjenik gradonačelnika, Grad Sarajevo
9. **g-din Hakija Osmić**, načelnik Općine Zavidovići

Pored gore navedenih, sjednici su prisustvovali i: **g-din Ivo Jerkić Ino**, načelnik Općine Čitluk i predsjedavajući Skupštine Saveza, **Slaviša Šućur**, GAP, **Hazbo Ličina**, Općina Zenica - Direktor uprave za imovinsko-pravne poslove i katastar, **Dragana Solaković**, Grad Sarajevo - pomoćnik gradonačelnika, **gđa Vesna Travljanin**, Direktor Saveza, **gđa Elvira Imširović-Bolić**, viši saradnik za pravna pitanja, **gđa Zlata Turkić**, viši saradnik za rad sa komisijama i institucijama vlasti i **gđa Selma Fišek**, saradnik za pravna pitanja.

G-din Smajlović pozdravlja prisutne i otvara Devetu sjednicu Predsjedništva Skupštine Saveza.

G-din Smajlović predlaže Dnevni red na usvajanje kako slijedi:

1. Usvajanje Zapisnika i zaključaka sa Osme sjednice Predsjedništva
2. Priprema materijala za Skupštinu Saveza
 - 2.1. Izvještaj o radu Predsjedništva Skupštine Saveza općina i gradova Federacije Bosne i Hercegovine za period februar 2009. – april 2010. godine
 - 2.2. Izvještaj o radu komisija Skupštine Saveza općina i gradova Federacije Bosne i Hercegovine za period april 2009. – april 2010. godine
 - 2.3. Plan rada Saveza općina i gradova Federacije Bosne i Hercegovine za period 2010. – 2011. godina

- 2.4. Odluka o izmjeni Odluke o obrazovanju Komisije za imovinska pitanja, prostorno uređenje, stambeno – komunalne djelatnosti i zaštitu životnog okoliša
3. Realizacija zaključaka sa prethodne sjednice Predsjedništva:
 - a) Odgovor Premijera Federacije Bosne i Hercegovine na akt Saveza općina i gradova Federacije Bosne i Hercegovine broj 129/10
 - b) Zakon o premjeru i katastru nekretnina
 - c) Zakon o šumama
4. Naša realnost: Projekat „Humana općina/humani grad“
5. Informacija o stanju naplate članarina Saveza
6. Tekuća pitanja

Dnevni red je jednoglasno usvojen.

1. Usvajanje Zapisnika i zaključaka sa Osme sjednice Predsjedništva

G-din Smajlović otvara diskusiju.

G-din Salem Dedić ističe da je na Osmoj sjednici Predsjedništva Skupštine Saveza održanoj u Odžaku dao neke dopunske rečenice koje nisu navedene u zapisniku, te predlaže da se to evidentira. Naime, naveo je da „smatra da je bilo neophodno da u delegaciji Saveza koja se sastala sa premijerom budu predsjedavajući Skupštine Saveza i predsjednik Predsjedništva Skupštine Saveza, a što je i Premijer konstatovao“.

G-din Smajlović ističe da je procijenio da njegovo prisustvo nije bilo potrebno.

Nakon konstatacije da nema više prijavljenih za diskusiju, stavlja Zapisnik i zaključke na glasanje.

Zapisnik i zaključci su jednoglasno usvojeni uz prijedlog za dopunu.

2. Priprema materijala za Skupštinu Saveza

2.1. Izvještaj o radu Predsjedništva Skupštine Saveza općina i gradova Federacije Bosne i Hercegovine za period februar 2009. – april 2010. godine

G-din Smajlović otvara raspravu.

S obzirom na činjenicu da nema prijavljenih za diskusiju, stavlja Izvještaj na glasanje.

Izvještaj je jednoglasno usvojen.

2.2. Izvještaj o radu komisija Skupštine Saveza općina i gradova Federacije Bosne i Hercegovine za period april 2009. – april 2010. godine

G-din Smajlović otvara raspravu.

S obzirom na činjenicu da nema prijavljenih za diskusiju, stavlja Izvještaj na glasanje.

Izvještaj je jednoglasno usvojen.

2.3. Plan rada Saveza općina i gradova Federacije Bosne i Hercegovine za period 2010. – 2011. godina

G-din Smajlović otvara raspravu.

S obzirom na činjenicu da nema prijavljenih za diskusiju, stavlja Plan rada na glasanje.

Plan rada je jednoglasno usvojen.

2.4. Odluka o izmjeni Odluke o obrazovanju Komisije za imovinska pitanja, prostorno uređenje, stambeno – komunalne djelatnosti i zaštitu životnog okoliša

G-din Smajlović otvara raspravu.

S obzirom na činjenicu da nema prijavljenih za diskusiju, stavlja Odluku na glasanje.

Odluka je jednoglasno usvojena.

3. Realizacija zaključaka sa prethodne sjednice Predsjedništva:

a) Odgovor Premijera Federacije Bosne i Hercegovine na akt Saveza općina i gradova Federacije Bosne i Hercegovine broj 129/10

G-din Smajlović otvara raspravu. Smatra da je napravljen dobar potez sa sjednice Predsjedništva Skupštine Saveza održane u Odžaku. Nakon dostavljanja pisma Premijeru Vlade Federacije Bosne i Hercegovine i njegovog odgovora, stvari su se uozbiljile. Smatra da trebamo imati plan „B“ kako bismo mogli tužiti zakone.

G-din Omerović ističe da ne vidi da smo išta uradili i ne vidi da su zakoni ušli u parlamentarnu proceduru. Bar oni koje smo pripremili: Zakon o premjeru i katastru nekretnina, Zakon o koncesijama, Zakon o šumama, Zakon o zaposlenicima u organima lokalne samouprave. Nema ih u proceduri. Dobili smo odgovor od Premijera, ali smatra da nam treba način jer Savez nije ništa uradio da zakoni uđu u parlamentarnu proceduru. Imamo Zakon o principima lokalne samouprave koji je jasan i za koji je mislio da nam daje mogućnost, ali nema tu ništa. Navodi i činjenicu da smo došli do poslanika u Parlamentu, ali i da oni ništa ne rade. Smatra da je tu rješenje da se zakoni koje smo uradili nađu u Parlamentu. Ističe da nam je cilj da kvalitetnije radimo i da s tim u vezi trebamo sagledati naše mogućnosti.

G-din Smajlović konstatuje da u Parlamentu nisu usvojili ni zakon koji nama ne odgovara.

G-din Šućur obrazlaže da je Zakon o šumama tek sada u fazi da može ići u parlamentarnu proceduru. Kod svih zakona, uvijek je prva adresa Vlada Federacije BiH da se s njima dogovorimo. Pošto je Zakon o državnoj službi u FBiH pao na Ustavnom sudu FBiH, trebamo poslati naš Zakon o zaposlenicima u proceduru, s obzirom na činjenicu da se pojavila pravna praznina. Smatra da sa ove Skupštine trebamo poslati jasnu poruku u smislu da je Savez pripremio zakone i da bi bilo dobro organizovati javnu raspravu u Parlamentu FBiH gdje će se poslanici upoznati sa tim zakonima.

G-din Ajkunić smatra da smo puno postigli. Treba da se čuje glas preko Saveza da zajednički djelujemo. Trebamo biti partneri sa Vladom i Parlamentom. Trebamo ponovo uputiti pismo da budemo partneri, da je Savez taj kroz koji će se čuti glas lokalne zajednice. Smatra da na Komisiji trebaju biti prisutni članovi Predsjedništva da prezentiraju šta Savez radi.

G-din Omerović smatra da nam vrijeme prolazi i da ne trebamo puno čekati. Također smatra da ne trebamo previše raspravljati. Navodi da je iskoristio momenat da Tihiću saopći da ćemo tužiti sve zakone koji su do sada usvojeni.

G-din Smajlović ističe da prvi put imamo situaciju da se uvažava Savez.

G-din Čenanović smatra da trebamo što prije raditi na tome da Savez bude faktor, da saradnja sa Vladom bude kvalitetnija. Dalje, da se napravi kvalitetna strategija i nađemo modus da budemo što

prihvatljiviji Vladi, a i Vlada nama. Pita se kakva nam je korist ako usvojimo zakone koji se ne mogu implementirati.

G-din Smajlović ističe da se trebamo izmaći izvan općinskog interesa, odnosno podići na veći nivo.

G-din Živanović smatra da segment konsultovanja sa Savezom treba razraditi dodatno. Ističe da je Vijeće ministara BiH usvojilo Pravila konsultovanja koja i mi možemo razraditi na sličan način. Smatra da zakone ne treba stavljati na dnevni red sjednica Vlade ako se ne konsultuje Savez. Misli da treba iskoristiti Skupštinu da iniciramo ova Pravila.

G-din Šućur upoznaje prisutne sa činjenicom da postoji holandski model, tzv. Kodeks, koji je detaljno razradio procedure konsultovanja. GAP posjeduje taj dokument, te će ga dostaviti Savezu.

G-din Hajder ističe da svi članovi Predsjedništva imaju legitimitet, jer predstavljaju lokalne zajednice sa područja kantona, da prisustvuju sjednicama kantonalnih skupština, te pojačaju i izvrše pritisak na iste.

G-din Omerović smatra da sve ovo dugo traje. Ističe da smo pokušali sa Vladom, sa poslanicima. Predlaže da pokažemo našim poslanicima odgovor od Premijera. Konstatuje da, sudeći po dopisu ministra iz ZE-DO kantona, očigledno je da on ništa ne razumije. Navodi da se sa Vladom ne može i da nam ostaju poslanici. Vlada neće da saraduje, Premijer kaže da od Zakona o zaposlenicima ne postoji gori. Trebamo da pronađemo put, poslanike i da lobiramo.

G-din Osmić se nadovezuje na Zakon o državnoj službi. Upoznaje prisutne da je krajem februara donesen Pravilnik kojim je predviđeno da apriori mora prvi sa liste da se zaposli, te konstatuje da se na taj način mijenja Zakon Pravilnikom.

G-din Šućur ponovno ističe da je Zakon o državnom službi pao na Ustavnom sudu, te da Agencija nema pravo da se miješa u zapošljavanje. Navodi da OHR nije dao da se usvaja Zakon o zaposlenicima u organima lokalne samouprave.

Jednoglasno je usvojen zaključak da Savezu g-din Šućur dostavi Kodeks, g-din Živanović Pravila, te da na slijedećoj sjednici imamo akt koji ćemo ponuditi Vladi Federacije Bosne i Hercegovine. Nakon toga, Savez će slati uregencije svaki dan. Također je usvojeno da na sjednicama Komisije za lokalnu samoupravu Parlamenta FBiH prisustvuju članovi Predsjedništva Skupštine Saveza.

b) Zakon o premjeru i katastru nekretnina

G-din Smajlović otvara raspravu.

Jednoglasno je usvojen zaključak da se pripreme zaključci za Skupštinu u okviru kojih će se nabrojati svi zakoni na kojima je Savez radio, te da se sutra iskoristi pres konferencija za slanje snažne poruke sa Skupštine.

c) Zakon o šumama

G-đa Vesna Travljanin informiše Predsjedništvo Skupštine Saveza da je Stručna služba realizovala zaključke sa sjednice održane u Odžaku.

G-din Smajlović otvara raspravu.

Informacija primljena k znanju.

4. Naša realnost: Projekat „Humana općina/humani grad“

G-đa Travljanin obavještava da će sutra, na Skupštini, Udruženje građana Naša realnost prezentirati projekat „Humana općina / humani grad“.

G-din Smajlović otvara raspravu.

Informacija o realizaciji projekta je primljena k znanju.

5. Informacija o stanju naplate članarina Saveza

G-đa Travljanin informiše o stanju naplate članarina koje nije zadovoljavajuće. Moli Predsjedništvo Skupštine Saveza za stav u vezi sa ovim za sutrašnju Skupštinu. Imamo općine koje kontinuirano ne plaćaju. Da li podijeliti ovaj materijal na Skupštini? Ističe da je Savez bio prisiljen da primi donacije od Raiffeisen banke i Itinerisa u iznosima od po 4,000.00 KM kako bi pokrio troškove Skupštine.

G-din Smajlović otvara raspravu.

Jednoglasno je usvojen zaključak da se sutra materijal plasira na Skupštini.

6. Tekuća pitanja

G-đa Travljanin informiše Predsjedništvo Skupštine Saveza da je zaposlenici Stručne službe Saveza Selmi Fišek, po sili zakona, radni odnos sa određenog prerastao u neodređeni, te predlaže Predsjedništvu Skupštine da joj da saglasnost da sa istom zaključi ugovor o radu na neodređeno vrijeme.

Jednoglasno usvojeno.

G-đa Imširović-Bolić informiše o inicijativama Kaknja i Maglaja vezanim za Zakon o zaštiti životinja s obzirom na činjenicu da su se pojavili problemi u primjeni istog, te o aktivnostima Saveza vezanim za Zakon o prodaji stanova na kojima postoji stanarsko pravo.

Jednoglasno je usvojeno da se Zakon o zaštiti životinja ne spominje u zaključcima.

Nakon što je konstatovao da su sve tačke Dnevnog reda iscrpljene, g-din Smajlović zaključuje Devetu sjednicu Predsjedništva Skupštine Saveza.

Predsjednik Predsjedništva Skupštine
Husejin Smajlović, s.r.